



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Oe-cusse

4 Abril 2016

Tribunál Distritál Oe-cusse kondena arguidu sira ba kazu explorasaun seksuál hasoru lezada nain 3 ida-idak ho pena prizaun tinan 7 no tinan 5

Iha 29 Marsu 2016, Tribunál Distritál Oe-cusse prezide leitura akordaun no kondena arguidu AS ho pena prizaun tinan 7 no arguidu AP ho pena prizaun tinan 5. Tribunál konsidera arguidu nain rua komete krime explorasaun seksuál hasoru lezada AIC, SW no GI ne'ebé nu'udar sidadaun Indonezia. Kazu ne'e akontese iha Distritu Oe-cusse.

Tribunál prova katak iha 14 no 15 Abril 2015, arguidu nain rua komete krime explorasaun seksuál tolu. Faktu ne'e produz bazeia ba arguidu AS (nu'udar negociante), ne'ebé deklarara parsialmente katak nia mak tula duni lezada sira ba iha otel. Maibé arguidu nega katak nia iha komunikasaun antes ho lezada sira. Arguidu mós deklarara katak nia la koñese lezada sira, la sai ponte ba lezada ho lezada nia kliente sira no nia la simu osan hosi lezada AIC.

Entretantu arguidu AP nu'udar *motorista ojek*, konfesa totalmente tuir faktu sira iha akuzasaun ministériu públiku nian no reforsa liután hosi lezada AIC. Enkuantu ba lezada na'in rua seluk tribunál la konsege rona sira nia deklarasaun tanba antes polísia kaptura sira, arguidu na'in rua tula subar sira fila ba Indonezia.

Tribunál mós prova faktu hirak ne'e bazeia ba depoimentu hosi testemuña AL nu'udar otél nain. Testemuña AL deklarara katak arguidu AS mak aluga duni kuartu tolu ba lezada na'in tolu. Testemuña IdS nu'udar kliente ne'ebé deklarara katak nia iha duni lezada AIC nia kuartu laran.

Ministériu Públiku akuza arguidu nain rua kontra artigu 174 alineaia 1 no 2 (c) Kódigu Penál kona-ba explorasaun seksuál ba ema seluk.

JSMP fiar katak mesmu kazu explorasaun seksuál foin primeira-vez akontese iha rejiaun Oe-cusse, maibé desizaun ne'e bele fó lisaun ba ema seluk atu hadok-an hosi krime no konsidera katak explorasaun seksuál ba ema seluk nu'udar krime ne'ebé grave tuir enkuadramentu legál Timor-Leste nian," dehan Luis de Oliveira Sampaio, Diretór Ezekutivu JSMP.

Iha julgamentu antes iha 11 Marsu 2016, bazeia ba prosesu produsaun ba prova, tribunál halo alterasaun subtansial hosi krime explorasaun seksuál hasoru lezada AIC atu inklui mós lezada na'in rua seluk ne'ebé antes ne'e la inklui iha ministériu públiku nia akuzasaun.

Depois tribunál halo alterasaun ne'e, defeza husu tempu loron 10 atu analiza didiak ba alterasaun ne'ebé tribunál halo no tribunál mós konkorda pedidu ne'e. Entretantu ministériu públiku mantein akuzasaun ministériu públiku.

Depois loron 10, antes leitura akordaun, defeza apresenta nia pozisaun katak nia la konkorda ho alterasaun hosi tribunál atu inklui lezada nain rua seluk, tanba laiha provas suficiente kontra sira nain rua. Tanba ne'e defeza husu ba tribunál atu mantein kazu ne'e ho lezada AIC, maibé kuandu tribunál iha hanoin seluk husu ba tribunál atu fo justisa.

Kazu ne'e rejista iha tribunál ho Nú. Prosesu : 156/krime/2015/TDO. Leitura akordaun ba kazu ne'e, prezide hosi Dr. João Ribeiro (representa juis koletivu). Ministériu Públiku representa hosi Dr. Mateus Nessi no arguidu sira hetan akompañamentu legál hosi defensoria públiku, Dr. Afonso Gomes Fatima, Dr. Calisto Tout ho Dr. Antonio Sombai (advogadu privadu estajjáriu).

Komunikadu Imprensa ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Número AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun".

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org